

以自致若此權二十八歲成進士令陽曲一遵先  
君之治福後拔置諫垣以抗疏忤時浮沉外藩比  
遷遵撫甫三日逆闖篡弒因起兵討賊誅僞官奪  
僞印以迎 王師  
上命裁一督三撫總轄于遵化尋 召入政地  
隆恩特典懼不克荷以愧先德謹爲紀其略益用  
白助云

丁太夫人行實

先考諱沾 詔贈資政大夫原爲明之福山令清  
嚴孤介愛民如子見背時不孝方八歲猶記福民

傾城而出哭奠於蒿山鬼神欲泣不孝黃口兒顧  
何能狀且不知狀然循良實蹟有東人墮淚碑已  
足炳炳天壤矣不孝不知狀父而狀母不狀父腸  
欲割不狀父而狀母更腸欲割雖然先大人齋志  
以歿而家法肅肅母之教皆父之教詩云釐爾女  
士謂有士行也不孝官忝國史奉 勅纂  
太宗文皇帝實錄方表彰今古而於吾母闕然是  
不孝之溺職也爰不爲狀而爲實一切閨門懿德  
不能殫述謹將有關忠孝節義之大者泣血而質  
紀之先大人四十無子嫡母張祇生一女心竊憂

之聞農民丁諱有冬之女賢往聘之卽吾母也張  
母見其端莊靜穆大喜曰古有以雜佩贈賢者何  
况門以內有賢者如此吾姊妹也何云嫡庶遂以  
家政委焉三年而不孝生先大人以家貧親老筮  
仕福山奉祖父母板輿甘旨無缺一日圍爐不孝  
見火箸繫索問曰此何爲先大人笑曰防脫失耳  
不孝曰何不去此縱脫一存一先大人甚喜曰此  
兒慧可讀書退食之暇手授字口授句讀養親教  
子天倫至樂也歷三年輒病不起傷哉痛哉上有  
八旬翁姑下止八歲孤兒宋氏之不絕如綫二母

扶櫬二千里歸途次艱難賴蒼頭李夢魁周旋之  
歸則宋大荒瘠田數百畝一望皆蘆荻大父母年  
衰不能理家務二母脫簪珥買耕牛命蒼頭皇甫  
叅墾之叅曰遭家不造奴有死以報主人耳一二  
年而田大易始得有衣食祖母田嫡母張以哀痛  
相繼逝叔生員渥亡在父先無子叔母劉氏矢志  
靡他母遂與共居形影相弔日夜課兒讀機聲軋  
軋相應母不識字見兒課業爲衡者所鉤塗輒淚  
簌簌下一日讀書有字不能識棘口不成讀以問  
二母二母大哭曰安能起爾父而問之耶不孝出

門必告母母誠曰某某賢當從之某某不肖當遠之不孝唯唯不孝年十七入庠大父九十矣謂母曰我老人賴賢媳無失養又教我孫成立我感爾吾子亦感爾於地下也大父矍鑠善飯猶陪賀客飲里中稱爲地僊壽至九十有四直指丘公兆麟聞之疏其事於熹廟三母并旌客投詩有不待兒官詔已頒之句蓋言母之自致也家有五喪一曰祖考一曰祖母一曰父一曰嫡母一曰叔不克舉母曰我所以未送死者爲兒未成立耳今何憾一日手發五喪祭葬盡禮里人歎曰宋家賢寡婦真

不愧莊敏公家風云不孝二十四舉于鄉二十八成進士爲陽曲令二母誠曰爾父善人之報得有今日兒其慎旃一日退食母問不孝曰我在衙聞箠楚聲果百姓有罪耶不孝慚懼爲加謹邑有孝子節婦必親禮其廬告于二母二母色喜時有買鉛之令母聞之曰兒奉此令但可買不可採爾父在福山時奸民以礦報爾父爾父痛治之曰汝無殺我民民甚德之兒記吾言不孝唯唯不孝之不敢擅箠楚民以大役擾民者母之命也拔置掖垣草銓政數十年大弊貽禍封疆一疏直糾主爵者

婦曰無觸禍機母笑曰兒爲言官何計此不孝之不敢黨同不敢緘默者母之命也比遷晉藩母曰時不淑矣我兩媪白髮垂垂爾盍棄官終養不孝曰兒數請兩臺兩臺堅不從劉母笑曰爾不爲官問兩臺耶母曰爾叔母言是不孝之不至隱忍依阿以危其身者母之命也歸家數年侍二母甚歡無何劉母逝母痛曰劉母與我相依如一人共憂患安樂者三十餘年雖我弟婦長于我我姊也師也一飯一衣我必先奉之伊不以粒絲私其母家養翁教姪大有功德于宋門一旦死無子無女吾

家無持三年之服者忍諸爾時尚有長兒焯在遂以犖兒爲服齊衰三年母之曉然大義如此至壬午賊破歸德不孝日負母走白刃中不保朝夕母甚泰然不孝問其故曰此數耳憂之何爲客寓鎮江主爵者以危疆需人勒令監軍遵化母曰時至此惟有生死相將耳監軍三月授巡撫三日而李賊篡弒破京師僞權制等將軍布滿三協不孝與大將軍唐公鈺集數百人從白羊峪起義兵趨入遵城劔戟森然諸將歃血誓師升堂拜母母亦拜勉以大義諸將感奮三日而遵薊四路之賊皆授

首飛奏功于關門賞賚有差是誅篡復仇以迎  
王師母成之也一日

上賜母宴于湯泉遠近榮之迨不孝擢今官母曰  
官愈大心愈小兒慎旃勉旃貧家米鹽事我老媪  
優爲之不須兒也不孝唯唯一日呼犖兒曰我見  
人之子孫於先人誕忌多不記憶孫取筆來我口  
述之爾手記之有季叔庠生湛亦早世叔母陳氏  
有子庠生森在里中一日母念之曰爾陳叔母是  
我幼弟婦孀居悽苦數年不見我有一姊窮鄉下  
戶我甚思之語多悽然有永別之意偶病痰嗽百

藥罔効問曰詔書封贈兒官可能及祖父母耶若  
止封我心終不安不孝曰兒官應及祖矣母悲喜  
交集命婦輩爲之浴一日不言而絕屬纊之日不  
忘父母其天性純孝如此傷哉痛哉不孝亦不能  
久居人世矣

上慮臣哀毀 遣同官大臣 賜茶酒玄狐 諭

慰備至 特恩隆禮皆臣子所不敢望者又 允

部臣請予祭一壇父母合葬夫 諭祭非已受實

封不得承我母雖遇 恩詔未經部覆而 天恩

慨俞且品頒光祿 命重禮臣又特典也我母一